galia sfondrata la manda con la galia Vizamana di Candia, andava a fondi per esser trista, al Zante; e lui, come à dito, è su la Pexara, e dice: Idio ne meti la sua santa mano! Non sa come Dio soporta tanta virtù contra christiani; e li sia provisto de navilij, polvere etc. À scrito a Corfù li mandi parte di le galie è a la Vajusa. Item, post scrita, dice aver inteso dal capetanio, le galie prese esser la Leza e la Mosta.

Del ditto vice capetanio zeneral, data ivi, al Prodano, a dì 25. Scrive, a dì 22 zonse in arma' la nave Priola, patron Polo di Domenego; e, ricevute nostre letere, e Mathio da Lies con sguizari e schiopetieri 35, manda ducati 3000, parte per Napoli di Romania; e à spazà la galia di sier Francesco di Mezo con hordine vadi a Napoli, poi vadi in Candia con letere a quel rezimento, provedi con quelli feudatarij e altri de homeni, danari etc., e armi subito quelle nave sono de lì. Item, ricevete alcune poche monition, ma sopra tutto li sia mandà polvere, freze e curaze.

Ordine di sier Hironimo Contarini, vice capetanio zeneral di mar, dato a l'armada nostra.

Nel nome del nostro Signor Dio, et de la gloriosa madre Verzene Maria, et de l'evangelista et protetor nostro missier San Marco, questi sono li ordeni da esser observadi nel tuor de l'impresa contra l'armata del signor turco, nemicho de la sancta fede, et de l'illustrissimo ducal Dominio nostro de Veniexia, imperhò

El clarissimo missier Hironimo Contarini, per el prelibato serenissimo et invictissimo duce, domino nostro dignissimo, vice capetanio zeneral da mar, comanda a tuti magnifici provedadori, capetanij, sopracomiti, patroni et ziascum altro per suo grado, che, per quanto hano caro la gratia dil prefato illustrissimo Dominio, et soto pena de la vita, irremissibiliter et senza algum respeto da esser observato, servar debino con ogni integrità, studio et advertentia li muodi et ordeni infrascripti, quando per sua magnificentia serà ordinato. In primis:

Vuol, ordena et comanda esso clarissimo vice general, che, senza fallo alcuno et preteritione, tutti magnifici provedadori, capetanij, sopracomiti et patroni, con li legni a lhor comessi, sì grossi come sotilli, star et nudrir se debino a presso lui, in conserva et unione sua, et da quello non si alargar de vista, senza expressa licentia et ordine suo, sotto la preditta pena.

Poi vuol, ordena et comanda, che quando li parerà de offender, el nemicho hessendo sorto prima, li magnifici capetanij de galie grosse et nave oponer se debino a geto di bombarda con tute galie grosse, nave et quare, da esser ordinate con equalità nel star et offender per essi capetanij, zoè el capetanio de galie grosse a banda dextra, et quel de le nave a banda senestra; et asestati al debito ordene, ogniun, virilmente, con advertentia et bon ochio, sbarar fazi le artilarie sue in l'armata nemicha, et perseverar in tal offensione fino per esso clarissimo vice general serà fato li segni ordinati et infrascritti.

A banda destra de essi capetanij, oponer se habi 242 el magnifico missier Hironimo Pisani, provedador, con le galie a lui, *ut infra*, deputate.

A banda sinistra, el magnifico missier Alvise Salamom, vice provedador, con le galie a lui, ut infra, deputate; qualli, similiter, sbarate le artilarie, virilmente et al meglio potrano, ofender debino.

Poi esso clarissimo vice general, con il resto de galie, offenderà da quella parte li parerà.

Et advertischano tuti, de non preterir l'hordine preditto, nè levarsi da le poste a loro deputate, o ananzi o indriedo tirarsi fuor de l'hordine, soto la pena sopra scrita.

Si veramente l'armata nemicha fusse a la vella, et fesse camino con la equalità et muodo preditto, seguir se debbi a geto di bombarda, ofendendola nel muodo preditto.

Et adziò tutti intender possino quando serà tempo, et esso clarissimo vice general vorà, seguir se debi l'hordine preditto: la magnificencia sua farà levar a poppe el suo gaiardo da bataglia, et alzar et calar 3 fiate, lassandolo poi così levado fino vorà duri tal offensione, et bombardar; et quando vorà se manchi dal fato preditto, calerà dito gaiardo.

Et parendoli de investir, notificha che, lassando ditto gaiardo im piedi, farà levar etiam una bandiera quara in andrinello, quale subito levata, ogniun al muodo sopra ordinato, gaiarda et virilmente, con debita distantia, che l'uno di legni nostri non offenda l'altro, investir debbi ne l'armata nemicha, non havendo rispeto più a legni grossi che menuti, ma quelli li serano avanti investir debino, senza intervallo di tempo scorendo, ritornino a l'investir preditto, fazendo, per tenor de questa, cauti tutti quelli che se inchadenerano con algum di legni di nemici a tempo di tal bataglia, esso clarissimo general l'harà per incorsso ne la sopra scrita pena.

Et cussì ordena, soto essa pena, nium prosuma levarsi de la impresa, fino che li gaiardi preditti sta-